


清會典

三十七下八

戶部 十九下六



漢書
九〇八號

| | | | | | | | |
|--|--|--|-------|-----|--|--|-----|
| | | | | | | | 漢書門 |
| | | | | 九〇八 | | | |
| | | | 一三二 | | | | |
| | | | 一〇 | | | | |
| | | | 一六〇 | | | | |
| | | | 冊架函號類 | | | | |

| | | | |
|------|-----|----|----|
| 內閣文庫 | | | |
| 三九 | 九〇八 | | 漢書 |
| 五 | 一三二 | | |
| 六 | 一〇 | | |
| 冊架 | 冊架 | 冊架 | 冊架 |

| | | | |
|------|-----|------|--|
| 內閣文庫 | | | |
| 番號 | 漢 | 908 | |
| 冊數 | 160 | (20) | |
| 函號 | 295 | 10 | |



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM. Kodak





恩詔。

毋

凡被災地方。該管官應照例動支倉糧。實心散給。
致失所。○又題准。山東武定等三州。縣。衛。秋被旱
災。動倉穀賑濟。○又題准。湖廣武昌府屬八州
縣。衛。夏被水災。發穀賑濟。○又覆准。黃州府屬
蘄州。秋被蟲災。及鄖陽府屬鄖陽等縣。秋被旱
災。行令該撫。各開賑三箇月。○又題准。湖南長
沙府屬益陽縣。夏被水災。動支倉穀賑濟。○又
覆准。江西清江等縣。上年被災。動支積穀賑濟。
○四十八年。議准。直屬武清等十三州縣。秋禾
被淹。民食維艱。自本年十月十五日起。至次年

三月止。在於各被淹地方。設粥廠賑濟。○又覆准。山東金鄉等四縣被災。動常平倉穀四萬石。按口散賑。○又覆准。湖廣武昌等州縣。衛。夏被水災。賑濟饑民。○又覆准。江南淮。徐。揚。三府屬。疊被水災。倉無存穀。將司庫四十七年截留平糶銀內。動十萬兩賑給。大口。給銀三錢。小口。給銀一錢五分。○又題准。浙江餘杭等六縣被災。將常平倉穀賑濟。○四十九年。覆准。直隸霸州等七州縣。夏秋雨水過多。田禾淹沒。動本處倉穀。自十一月起。至明年三月止。按數散給。如有

不敷。卽於附近地方借給。○又覆准。邳州等十三州縣。併徐州衛。秋被水災。作速賑濟。勿致流移。○又覆准。河南商邱等三十九州縣被災。收成歉薄。將常平倉穀賑濟。○又覆准。淮安府舒城縣。秋被水災。行令該撫作速賑濟。毋致災黎失所。○又議准。福建泉州。漳州。地方被旱災。將今冬應運鎮江漕糧。截留十萬石。運至狼山。松江。湖州。漕糧。截留各十萬石。運至乍浦。令福建總督。選賢能總兵官二員。親帶大小戰船。至狼山。乍浦交割。運至漳泉等處散給。其本年未完

錢糧暫行停徵。○又覆准。浙江漕糧。向係十月開徵。今於九月二十五日開徵。不論早糶晚米。一概徵收。務期速完。以濟福建賑事。○五十年。題准。賑濟江南六安等州縣被災人民。○又題准。湖南衡陽安仁二縣。夏被水災。饑民乏食。將常平倉穀賑濟。○五十一年。覆准。浙江奉化等州縣。風雨傷禾。行令地方官。作速賑濟。○又題准。江南海山等州縣。衛被災。將捐穀麥米賑濟。如本處積貯不敷。於隣近府州縣。協濟散賑。○又題准。賑濟湖南臨湘縣被災人民。○五十二

年。題准。浙江寧海等縣旱災。發穀賑濟。○又覆准。甘肅靖遠衛等處薄收。動倉糧接濟貧民。併將本年錢糧緩徵。○又覆准。廣東三水等縣水災。按口給穀賑濟。○又題准。雲南尋甸。嵩明二州。二月地震。兵民被災。將各屬捐穀。撥給賑濟。○五十二年。覆准。江南上元。桐城等州縣。衛被災。將常平倉穀酌量賑濟。○又

諭。直隸各省州縣官。或革職。或被叅解任。或身故者。妻子尚能回籍。其縣丞。主簿。典史。驛丞等微員。革職解任身故者。無力回籍。羈留異鄉。不免凍餒。甚至有全

大清會典 卷三十一
家死亡者。即使犯罪至死。亦與伊等妻子無涉。此等甚屬可憫。如各地方鰥寡孤獨。不能度日。向設立有養濟院養育。此等微員。理應撫恤。嗣後將伊等作何令其回籍。大學士與九卿會議具奏。遵

旨議定。令直隸各省查明所屬地方。如有縣丞。主簿。典史。驛丞等。一應微員內。革職被叅解任身故。無力回籍。羈留異鄉者。交與該督撫查明。設法捐助。令回原籍。無致妻子顛連失所。死亡異鄉。仍於歲底開明回籍數目。咨報戶部奏

聞。嗣後永遠遵行。○又覆准。浙江山陰。建德等五縣。

併嚴州所。俱被水災。作速賑濟。○又覆准。錢塘山陰等十六州縣。併衢州所。秋被旱災。將常平倉所貯穀石散賑。○又覆准。陝西甘屬去歲薄收。於附近存貯糧內撥賑。自二月起。至六月終止。每日大口。給糧三合。小口。二合。其有耕田缺乏籽粒牛具者。每畝給糧五升。有未回籍者。令該地方官酌給路費搬回。○又覆准。令甘屬各州縣修城。使窮民得以傭工度日。○又題准。賑濟湖廣嘉魚等十七州縣。衛被災饑民。○五十四年。覆准。江南太倉等十四州縣。衛秋被水災。

將常平倉穀賑濟。如有不敷。再於江蘇淮三府存貯截留漕米內酌量撥給。○又覆准。陝西甘屬蘭州等處連年被災。分給買穀種銀兩。并照例給口糧養贍。○又議准。派大臣一員。巡查甘肅被災地方。銀米兼行賑濟。○又覆准。甘屬保安堡四寨。冰雹災傷。行令該撫將被災人民。作速賑濟。○又覆准。陝西靖邊等五處沿邊地方。雨水不足。將附近州縣存倉糧石。輓運賑救。○又覆准。直屬寶坻等州縣被災。動倉糧酌量賑借。○又覆准。賑濟河南商河縣被災饑民。○又

覆准。湖廣江夏嘉魚等州縣。併武昌武左沔陽三衛。秋被水災。將常平倉穀酌計地方受災輕重。分別賑濟。○五十五年。

諭。朕惟民爲邦本。必年穀順成。家給人足。乃愜朕撫育元元之意。自御極五十餘年。宵旰孜孜。無論遐方近地。編民疾苦。必備悉諮詢。設有水旱蠲賑。頻頒務求實惠。霑被羣生。蓋不徒事軫恤之虛文也。直屬順永保河宣五府。去歲雨水過多。穀耗不登。因全蠲額賦。撥米減糶。今巡撫以日下正當青黃不接之時。順永二府米價騰貴。疏請借道庫銀六萬兩。委員赴乏米

州縣。貴買賤賣。朕思閭閻蓋藏未裕。本地出米無幾。以銀易米。恐米價反致翔踊。現在京通二倉積米甚多。不如將舊米分發二十萬石於各州縣。賑濟乏食窮黎。官無轉售之勞。民獲現在之米。於地方大有裨益。○又題准。江南上元。桐城等州縣被災。人民乏食。給米賑濟。○又覆准。賑濟山東泰安等州縣被災人民。○又覆准。直隸文安。大城等縣被水村莊。將二十萬石倉米內。下剩米石散賑。○又覆准。浙江金華。新城等州縣。併衢嚴二府。秋被水災。動支倉穀賑濟。○又覆准。湖廣巴陵等州縣。

衛。夏被水災。饑民困苦。速行賑濟。○五十七年。諭。索倫人等効力圍場。甚屬年久。亦有現在出兵之人。聞被水災。朕甚惻然。今將朕所用戶部帶來銀兩內。動支一萬兩。前往散給。將被災之人。逐一查明。無房屋者。卽給賞房屋。無衣服者。卽給賞衣服。務令均沾實惠。以副朕軫恤至意。○又覆准。陝西平涼府屬靜寧等七州縣地震。查明賑濟。其續報安定等縣五處地震。一併酌量散給。○又覆准。江南桐城等三十州縣。併廬州等七衛。被災軍民。動支倉糧散賑。○又

諭。今年安徽所屬地方出蛟。大水傷民。督撫雖未奏聞。朕聞之。深爲憫惻。著督撫捐給銀兩賑恤。○又覆准。湖廣鍾祥等十一州縣。併武昌等七衛所屯地。秋被旱災。將常平倉穀賑濟。○五十八年。題准。江南泰州等州縣。被災饑民。給米散賑。○又覆准。陝西甘屬靖遠衛等十五處。夏被旱災。作速賑濟。○又覆准。浙江錢塘等二十一州縣。併衢嚴二所旱災。將存貯倉穀賑濟。○又覆准。會稽上海二縣。風潮傷禾。動備賑米穀賑濟。○又覆准。貴州鎮遠施秉二縣。官民房屋。被山水淹沒。

動倉穀賑濟。○五十九年。

諭。陝西省地方現有軍務。今歲糧穀適又歉收。已預頒諭旨。著總漕將運米路徑勘視具奏。協同總督辦事。除陝西歷年錢糧。屢經蠲免。明歲錢糧。另頒諭旨蠲免外。今雖動支常平倉糧散給。而地方官大半俱在軍前。現今所有。俱係署事官員。辦事人員。殊少。應照曩年差官賑濟山東百姓。遣往賑濟。遵

旨議定。動戶部庫銀五十萬兩。委司官運送。將西安延

安蘭州。分作三路散賑。併將陝屬各州縣衛所。廳。常平倉糧六十九萬二千石零。甘屬各州縣。

衛所廳常平倉糧六十七萬二千石內就近酌量散給除失收地方外如有應行散賑之處一面具題一面會同散給再旗民有情願効力人員許自備銀米赴部具呈將職名送散賑官處効力事竣照數目之多寡核明議敘○又覆准甘屬固原州等二十州縣衛夏禾被災動糧借賑併於西安藩庫存貯五十九年地丁錢糧內動銀十萬兩解送甘撫以備散賑○又覆准延慶等處地震大口給銀二兩小口給銀七錢五分無力之戶每戶散給銀一兩○又覆准江南

淮揚二府屬秋禾被災將常平倉穀酌量動賑○又覆准湖廣漢川潛江等八州縣衛夏被水災委員賑給自本年十一月起至次年二月止共賑四箇月○又覆准山西平汾二府去秋被旱動倉穀二十萬石散賑○又覆准臺灣颶風大作傷損人民倒塌房屋照保安等散賑例散給其船壞淹溺兵丁照出征病故綠旗兵丁之例賞給○六十年議准直隸山東山西河南陝西五省被災將各省常平倉穀酌量動賑其直屬常平倉先經正順廣大四府米貴將常平倉

穀十分之內。動三分糶賣。二分借給。今照此例酌量賑濟。山東濟。兗。東。青。四府。動支倉穀散賑。河南將截留漕米散賑。仍平價糶賣。山西將常平倉穀酌量平價糶賣。陝西去歲歉收。已發帑銀五十萬兩。遣部員三路賑濟。如有不敷。將河南續運米石。併湖廣運送米石。酌量散給。其陝省錢糧。已經全蠲。直隸四省。暫將錢糧緩徵。○又覆准。山。陝。二省。去秋歉收。小民艱食。良由地方官於閭閻疾苦。漠不關心。不能設法料理。以致百姓流離。行令山。陝。督撫。確查地方官內有

貪污實跡。不惜民瘼者。卽行題參。從重治罪。仍責令養活饑民。以貸其死。其平日不留心民瘼。而惡跡尚未昭彰者。該督撫卽行查明。亦令養活饑民。從寬暫留。以策後効。督撫徇庇不行查叅。別經發覺。一併治罪。如該地方官有真正實心愛民。設法賑救保全者。該督撫保題。准從優卽陞。○又

諭。今春雨澤甚少。備荒緊要。著發帑金五十萬兩。差大臣往山。陝。地方買米賑濟。○又覆准。江南徽州府屬歙縣等十二州縣旱災。令該撫查明存貯常平

倉穀。於隆冬散給。○又覆准。浙江仁錢等三十九州縣。併杭湖等五衛所。秋被旱災。人民乏食。著煮粥賑濟。○又覆准。雲南中甸地方。因罹火災。令督撫發帑銀二千兩。以一千兩買備布疋。茶葉。前往。按家口多寡。分別散賑。○又議准。臺灣窮民乏食。動倉糧散賑。○又覆准。行令各省督撫。遇有轉徙饑民來境。毋得遽行驅逐。令所在有司。隨便安插。或令傭工度日。或給值墾荒。如地方官。併富戶人等。有情願捐貲養贍全活多人者。督撫核實題薦。從優議敘。併通行各省。

督撫。遴委府州縣佐貳等官。遇有疾病饑民。務令設立棚廠。廣備丸散診視。不時查看拯救。○六十一年。

特遣大臣賑濟直隸贛皇等四十二州縣饑民。併發米各州縣煮賑。○又題准。江南上元等州縣。併揚州廬州等衛被災。發穀賑濟。○又題准。河南開封等五府所屬州縣。雨澤愆期。二麥失收。將存倉米石動賑。○又覆准。山東濟兗東青四府屬州縣。去年秋收歉薄。今春雨未遍。二麥無收。令於被災州縣衛所。將存貯倉穀開倉救賑。○又

覆准。湖廣鍾祥等七州縣。衛秋被旱災。田禾失收。軍民乏食。將常平倉穀動撥賑濟。○又覆准。東省壽張等六州縣。黃沁水發。禾麥被淹。將常平倉穀及監穀酌量賑濟。○又覆准。直隸長垣四州縣。黃沁水發。田禾被淹。動倉糧賑濟。○雍正元年。

詔。罰贖積穀。原以備賑。冬日嚴寒。恐鰥寡孤獨貧民。無以爲生。著直省各督撫督令有司。務將積穀酌量賑濟。毋令奸民假冒支領。○又

詔。各處養濟院。所有鰥寡孤獨及殘疾無告之人。有司留心。以時養贍。毋致失所。○又

諭。朝廷設官置吏。原以養民。遇有災荒。卽多方撫恤。方不負委任之重。今據山東巡撫奏稱。直隸河南隣境小民。資生無策。間有携家就近覓食者。朕覽奏惻然。當此春初。農事方興。若任其流離。則小民何歸。著直隸河南巡撫。卽遴遣賢員。招輯復業。核實賑濟。務令得所。勿失農時。仍督飭文武官弁。稽察奸慝。以安良善。方副朕惠養元元之至意。○又諭。朕受

皇考付託之重。撫有羣黎。夙夜孜孜。惟恐間閻失所。昨

山東巡撫奏稱東兗二屬上年二麥失收小民未免困苦直隸河南隣境之民資生無策亦有携家覓食者朕覽奏惻然比卽飭諭直隸河南巡撫加意撫綏招集復業但兩省巡撫並未奏聞朕恐其視爲泛常奉行不力九卿會同確議或特遣大臣或交與該撫作何賑濟安輯之法務使窮黎得沾實惠又前歲河南黃河潰決汎溢於直隸地方比年以來兩省近水居民耕種無資衣食匱乏均應加恩撫恤一併議奏遵

旨議定直隸河南二處各派大臣一員會同該撫將乏食窮黎速動常平倉穀查明戶口按數賑濟如常平倉穀不敷將分貯監穀併截留漕米賑濟其耕種無資衣食匱乏者酌量資給至携家覓食不能回籍者令直隸河南山東巡撫查明加意撫綏招輯復業仍將賑過大小戶口米穀數目造冊報部查核如有不肖官員侵蝕肥已併遲延遺漏者卽令派出大人指名題叅○又諭治天下要道莫過安民朕纘承大統以來軫念蒼生痾瘵時切直隸山東河南連年歉收特降諭旨緩徵遣官賑濟每歲京師五城設立粥廠自十月

初一日起。至三月二十日止。交五城御史煮粥賑饑。今猶青黃不接之時。著展期一月。煮粥散賑。至四月二十日止。但就食之民。來京者多。每日各加增米銀一倍。務使得沾實惠。以副朕憫念窮民之至意。○又

諭直隸河南山東流民。有就食京師。不能回籍者。著五城御史清查口數。量給盤費。送回本籍。毋致失所。遵

旨議定。每口。每程。給銀六分。其間有老病不能行走者。每口。每程。加給三分。以爲脚力之資。委員管

送。一面行文三省巡撫。飭令地方官。逐程出具收結。轉送至原籍。若有中途患病者。令地方官留養醫治。俟病痊之日。再行轉送。毋致失所。○又覆准江南蘇松常鎮淮揚六府屬之溧陽太倉等州縣。天道亢旱。禾苗枯槁。行令該撫。將各州縣積貯米。以及各案存倉米內。照數散賑。如有不敷。於新收捐穀內。奏賑。如再不敷。於存貯漕米內。酌量動用。其太倉等衛被災屯軍。於災田坐落州縣。一體賑濟。○又覆准河南中牟等縣。黃水漫溢。又武陟縣沁黃並漲。淹塌房屋。現

在貧民共三千五百八戶。動支地丁錢糧。每戶給銀一兩。○又覆准。河南開封府屬之陽武等四縣。麥收甚薄。不足接濟。仍賑給六七兩月口糧。○又覆准。河南歉收之後。復經河決。遣員會同巡撫。及司道。於被災州縣鄉村。親歷詳細察明。動用藩庫銀兩賑濟。○又覆准。發山東倉穀賑濟歷城等九十五州縣。衛所。被旱被水饑民。○又覆准。東省連年荒旱。秋收歉薄。兗州府屬之泗水。東昌府屬之堂邑等處。被災尤甚。如無穀之縣。動用庫銀。委員會同該地方官。按名散

給。著賑濟三箇月。有隣省就近覓食窮民。亦一體散賑。其稍可存活者。酌量動倉穀。並截留漕糧。減價平糶。秋收後。照數補足還倉。○又覆准。浙江富陽等縣。衛被旱乏食饑民。按口煮賑。至來年麥熟停止。○又遣員賑濟山西平定州。壽陽。徐溝。祁縣。饑民。○又覆准。平陽府屬之霍山。靈石。汾州府屬之平遙。介休。石樓。潞安府屬之襄垣。黎城。太原府屬之平定。沁州屬之武鄉。九州縣。動支庫銀賑濟。○又覆准。江西臨江等府屬。水冲田舍房屋。令該撫酌量賑濟。○二年。通

泰淮三分司所屬沿海場竈。海潮冲決。奉

旨。據奏七月內海潮冲決。范堤沿海二十九場。溺死竈丁男婦。鹽池草蕩。盡被漂沒。朕心憫惻。如同執熱。著卽動鹽課銀三萬兩。委員分頭賑恤。務使得所。不必該御史捐補。其未完折價錢糧四萬餘兩。悉行蠲免。毋得仍稱帶徵名色。致累現在窮丁。該部遵旨速行。○又覆准江南蘇松常鎮淮揚六府屬。太倉等州縣。本年海潮汎濫。人民被災。著將康熙五十八年截留漕米。及雍正元年二年例積穀折米。分發各屬。設廠煮粥賑濟。自本年十

一月初一日起。至明年三月終止。又蘇松等屬連歲荒歉。復罹重災。煮賑米石。恐有不敷。將現存司庫銀。動支五萬兩。於產米地方。採買接濟。○又覆准江寧山陽宿遷等縣。秋被水災。動支收捐例積米穀。自本年十一月初一日爲始。煮粥賑濟五箇月。○又

諭。前因浙江督撫等摺奏。七月十八十九等日。驟雨大風。海潮汎溢。衝決堤岸。沿海州縣。近海村莊。居民田廬。多被漂沒。朕卽密諭速行具本奏聞賑恤。但思被災小民。望賑孔迫。若待奏請。方行賑恤。恐

時日耽延。災民不能卽沾實惠。朕心深爲憫惻。著該督撫委遣大員踏勘。被災小民。卽動倉庫錢糧。速行賑濟。務使災黎不致失所。其應免錢糧田畝。卽詳細察明請蠲。凡海潮未至之村莊。不得混行冒蠲。至於緊要堤岸衝決之處。務須速行修築。毋使鹽水流入田畝。朕念切痾瘝。令早沾實惠。該地方官各宜實心奉行。加意撫綏。使凋瘵得蘇。生全速遂。以副朕勤恤民隱至意。○又

諭。今歲夏秋以來。直隸山東河南三省。雨水過多。小民謀生無術者有之。朕心甚爲憫惻。晝夜靡寧。茲秋成將屆。憂念彌深。該督撫可作速遴選賢員。實心詳察。其有生計蕭條。升斗無資。以及田地被淹。不得收穫。房廬倒塌。不安厥居者。卽一面賑恤。一面具奏。務使窮幽極僻之區。亦不致一夫失所。至所遣官吏。或有草率將事。及隱匿不聞。甚至捏報賑給。侵漁朦混。從澤不下究者。察出。將該管官一併從重治罪。斷不姑恕。督撫等實心誠求。竭力料理。如恤子孫。如辦家事。勿視爲具文。以稱朕宵旰憂勞之意。○又覆准。福建龍溪等三縣。溪水汎溢。淹壞人口房屋。速動倉穀賑濟。○三年。

諭。今冬天氣甚冷。京城一帶有窮民。廣寧門外安定門外養濟院。此二處將變色米。賞給一百石。煮粥賑濟。傳諭倉場侍郎。將變色樣米呈驗。然後賞給。○又覆准。浙江平湖等五縣俱被水災。其錢糧一例緩徵。凡被災饑民。設粥廠賑濟三箇月。○又覆准。直屬鄆州等七十二州縣。廳所秋禾淹沒。令地方官查明被災饑民。發穀賑濟。○又覆准。雲南曲靖府屬州縣。起蛟被水。淹沒田廬。動常平倉穀散給賑濟。併撥霑益局制錢。及備公銀兩。給窮民修葺房屋。其條丁銀米。暫緩徵三

箇月。○又覆准。河南祥符等十九州縣被災。動常平倉穀散賑。○又覆准。儀封。蘭陽。二縣黃河漫決。村莊被水更甚。動截留漕米賑恤。○又覆准。江南睢寧。宿遷。二縣水災。動支積穀。自十月初一日爲始。煮粥散賑五箇月。○又

諭。今歲直隸地方被水。小民乏食。朕軫念維殷。已截漕發倉。多方賑恤。但恐停徵之後。正值東作之時。農民謀食無策。著再加賑一月。如從前所發之米。不足賑糶。著確查奏請。增發米石。以副朕愛養黎元之至意。○又題准。直隸雨水較多。秋成稍薄。將

漕米三萬石。運送保定平糶賑濟。○又覆准湖廣臨湘等縣衛被旱。動支倉穀賑濟。○又

諭。前因今歲直隸山東河南三省雨水過多。小民被水受困。特降諭旨。令三省大吏。委員詳察。速行賑濟。今據山東巡撫奏報。歷城聊城等州縣秋禾被淹。農民失望。已飭各地方官撫恤等語。該撫務須督率有司。加意經理。毋使窮黎失所。○又

諭。於通倉六七成米內。不拘粳稷粟米。將十萬石運赴天津。聽候指揮。其運津脚價。動支通濟庫錢糧給發。仍不得有誤起卸。○又

諭。今歲天津等處地方被水。米價甚是騰貴。去歲盛京自海運過糧十萬石。今行文將軍府尹等。將伊地方糧十萬石。由海運至天津新倉。俟到日交與地方官收貯。將盛京等處倉內收貯舊米。每年糶賣。易進新米。所出舊米。若足十萬石。卽行運至。倘不足十萬石。酌量賤價買足十萬石之數。運至。今歲收成之處。尚未深知。不可遽定。今歲若果豐收。價值平賤。卽行買運。若價值騰貴。有不便之處。卽令將軍等將不便之處奏明。再若有自海運糧之商人。不必禁止。令自海運至天津貿易。天津以外。

不可令其往別省山東登州等處買賣。○又覆准。合滇省嵩明等五州縣地震被災人民。動常平倉穀散賑。○又覆准。山東濟充東萊四府屬歷城等州縣被水坍塌房屋無力蓋造者。飭令該撫督率有司加意賑恤。其被水災民暫動存倉米穀分別借給。俟來歲照數還倉。○又覆准。直屬霸州等七十二州縣廳所秋禾被水散賑三箇月。其被水村莊錢糧暫行緩徵。至大興等四縣雖勘不成災。小民被水乏食亦量賑一月。併於各屬存倉米內酌量糶借。俟秋收後買補還倉。

○四年覆准。江南淮安府屬之無為望江等州縣被災窮民。寒冬乏食。煮賑五箇月。其應賑穀石於隣近州縣積穀內撥給。○又覆准。安屬舒城等州縣夏雨連綿。田禾被淹。令該撫速行賑濟。○又

諭。朕軫念東省被水窮黎。粒食維艱。特允山東巡撫之請。於大清河興疏濬之工。令乏食小民得力役之資。爲餬口之計。今天氣和暖。土脉鬆潤。正施畚插之時矣。去秋該撫奏請設廠查賑。今赴工者衆。粥廠可以停止。但念此就食小民。其中豈無老弱

殘疾不能赴工者。煮賑旣停。麥秋之期尚遠。此輩窮無所歸之人。或仍至失所。朕心深爲惻然。應行文山東巡撫。將不能赴工之窮民。查明若干。每日仍給與升合之資。俟至秋收後停止。所用銀兩。俱作正項開銷。該撫嚴飭各州縣官。務實心奉行。以副朕養育百姓之至意。○又

諭聞福建今年春夏以來。雨水稍多。天氣寒涼。禾苗興發甚晚。目前米價昂貴。民食頗覺艱難。江西素稱產米之鄉。况去歲今春。皆獲豐收。理宜通融。以濟閩省。近聞江西地方官。遏糴不令出境。甚非情

理。著將江西存倉之穀。碾米十五萬石。動用脚價。遴委能員。卽速運至閩省交界地方。先期知會閩省督撫。委員領去。分給各地方。以濟民食。毋得遲延。○又

諭江南泗州。逼近黃河。地勢低窪。因去年黃河冲決之岸。尚未合龍。今年四月間。水勢漫溢。以致泗州地方。禾麥又被淹損。朕心深爲軫念。著布政使動支庫銀二萬兩。親往泗州。確查被災之民。逐戶散給。勿令鄉約里長。及胥吏人等。絲毫侵蝕。務使窮民均沾實惠。不致失所。○又覆准杭嘉湖三府屬

大清會典 卷三十一
被水。令該撫委員速行賑濟。○又覆准。廣東南
海等縣被水。動常平社倉穀石。按名散賑。○又
諭。上年廣東福建二省所屬郡縣。有數處歉收。是以
今年米價昂貴。已諭該督撫等設法接濟。撫恤貧
民。今年福建雨澤調勻。秋成豐稔。廣東早禾大收。
惟八月間雨水稍多。恐晚禾收成歉薄。至明歲青
黃不接之時。小民不無乏食之慮。此時正當預爲
籌及。應如何運送米穀。赴廣備用之處。著九卿確
議具奏。該撫所報濱海被水之十一州縣。應如何
賑恤之處。一併速議具奏。遵

旨議定。將各省常平倉事例。改爲運穀。令隣省皆得
捐運。廣東所捐穀石。俱照常平例。折半交納。計
各州縣賑發之穀若干。捐足原數。卽行停止。所
運穀石。不許在廣東買糴。務由本地運送。州縣
不得私收折價。違者。本生斥革。州縣叅劾。從重
議處。再令湖南廣西。於明年早禾收後。聽商賈
運販。不得遏禁。其現今被災之歸善等縣。將存
倉穀石。按名散給。再將錢糧緩徵。於五年夏熟
後。再行徵收。○又覆准。福建羅江等縣被水。動
倉穀賑濟。○又覆准。安屬泗州等處黃河冲決。

被災地方。速行賑濟。○又覆准。蕭縣等處。水雹傷禾。速行賑濟。○又覆准。江蘇等府屬州。縣。衛。被水災地方。速委員賑濟。○又覆准。江西南昌府屬被災。速行賑濟。○五年。

特遣大臣。御史。分在直隸被災。玉田等二十三州縣。逐戶計口。悉心勘查。發帑金十數萬散賑。○又覆准。江南。金壇等縣。上年被水。隆冬饑寒窮民。設廠煮賑。三月。○又

諭。聞江南。浙江。近水之地。亦有數處被水。未曾加以格外之恩。然軫念窮民。朕懷殷切。著江南總督。動用庫銀二萬兩。於上下兩江應用之處散賑。著浙江巡撫。動用庫銀一萬兩。於應用之處散賑。務選賢員辦理。令窮民均沾實惠。○又覆准。山東。鄒平等十三縣。被災。將常平倉穀。併所存截留漕米。酌量賑濟。

凡勸賑。順治十年。覆准。士民捐助賑米五十石。或銀一百兩者。地方官給匾旌獎。捐米一百石。或銀二百兩者。給九品頂帶。捐多者。遞加職銜。○十一年。題准。見任官員。并鄉紳。捐銀一千兩。米一千石以上者。加一級。銀五百兩。米五百石。

大清會典 卷三十一
以上者。紀錄二次。銀一百兩。米一百石以上者。紀錄一次。生員。捐米三百石。准貢。俊秀。捐米二百石。准入監讀書。○十八年。題准。凡捐穀。每二石。折米一石。豆。照時價計銀議叙。○康熙元年。題准。捐賑銀米。不分本屬隔屬。如一年內捐及額者。題請議叙。○七年。覆准。滿洲。蒙古。漢軍。並現任漢文武官紳。捐輸賑災。銀一千兩。或米二千石。加一級。銀五百兩。或米一千石。紀錄二次。銀二百五十兩。或米五百石。紀錄一次。進士。舉人。貢生。捐銀及額。出仕時。照現任官例議叙。生

員。捐銀二百兩。或米四百石。准入監讀書。俊秀。捐銀三百兩。或米六百石。亦准送監讀書。富民。捐銀三百兩。或米六百石。准給九品頂帶。捐銀四百兩。或米八百石。准給八品頂帶。○八年。題准。停止督撫。勸助議叙之例。○二十九年。覆准。江寧。邳。睢。等八州縣。并徐州衛。因被水災。田禾失收。以致窮民饑寒。曉諭本地鄉紳。捐輸接賑。○三十四年。

諭。自天津兩次運送盛京米石。所到日期甚速。大有裨益。兩次運米官員。捐輸官員人等。俱著議叙。遵

旨議定。郎中同知通判州同及八品筆帖式等官各加一級。其捐輸脚價官員一次者紀錄一次。二次者紀錄二次。捐輸脚價商人令該撫酌量獎賞。○六十年覆准。山陝被災地方紳士富戶并內外現任官員願捐米者計官職之大小捐米之多寡具呈該地方官照數收捐出給實收隨收隨報督撫題明轉咨吏部遇缺卽陞富戶題明破格旌獎。

大清會典卷之三十七

大清會典卷之三十八

戶部

蠲恤四

借給

康熙三十年

諭。山西平陽府岳陽等八州縣被災人民將五。崞二縣所儲米石貸給。○又覆准。平陽府屬夏。聞等十五州縣再將太。太二府屬買貯捐米借給。於明年秋收還倉。○三十一年覆准。山東存貯捐穀二十八萬九千餘石。將此酌量借給窮民接濟春耕。俟秋成照例償還。○又覆准。夏。聞等縣捐項將

竣。饑民日增。各州縣有分貯米。令借給窮民。
○又題准。西鳳。二府屬。叠遭荒旱。動州縣捐銀
借給。以爲種籽之用。○又覆准。高平。臨川。武鄉。
沁源。等州縣。去年雖未成災。亦俱歉收。該州縣
各有頒發分貯米價。令借給窮民。以爲口食籽
種之資。俱於一年秋成償還。○三十二年。覆准。
山西太原等縣夏災。動縣倉積貯米石。借給貧
民。○三十三年。覆准。江南全椒縣旱澇交侵。動
捐穀借給災民。○三十四年。覆准。宛平等十五
廳縣。續被秋災。動倉糧借給窮民。○三十五年。

諭。直屬頻年被災。屢經蠲賑。俾小民得以資生。寶坻等
州縣。受水患之處甚多。今年錢糧。業已免徵。無可蠲
恤。該撫責成賢能地方官。確察實係窮民。借支倉米。
務令均霑實惠。不致流離失所。○又

諭。固安等十二州縣。借米石。於三十六年秋收後。照
數還倉。○三十六年。覆准。甘肅安化等州縣被旱。動
積穀借給窮民。再動司庫銀賑濟。三十五年未
完錢糧。暫行緩徵。○三十七年。議准。山西平定
等州縣。衛所。三十五。六。兩年借給貧民米穀。保
德等縣。衛。三十七年借給貧民米穀。因連歲薄

收。將三十五、六兩年借穀。俟三十八年秋收補還。三十七年借穀。俟三十九年秋收補還。○又覆准。湖廣鍾祥等州縣饑民。動積穀借給。○三十八年。覆准。直屬贊皇縣。向因紙糊套賊爲害。附近居民。悉多逃避。今漸歸鄉里。失業既久。資生無術。暫動糶糧。借給牛種籽粒。俟秋收還倉。○又覆准。湖廣武陵等三縣被水災饑民。將積穀借給。○四十一年。覆准。西寧運西安糧石。借給本地窮民。於明秋照數還倉。○又覆准。山東海豐等州縣被水。於積貯糶三存七穀石。借糶

並行。以濟窮黎。○四十二年。覆准。將

盛京所貯米穀。酌量借給烏喇虞人。○又覆准。陝西漢中府屬之南沔等七州縣。夏被水災。秋被蟲災。行令該撫。遴委賢能官員。親身踏勘。卽動倉糧借給。俟秋收後照數還倉。○又覆准。河南祥符等州縣被災饑民。動倉穀借給。○四十三年。題准。湖南各屬。去年秋收歉薄。將積貯倉穀一半。借給窮民。俟秋收還倉。○四十五年。題准。畿輔米價漸昂。已將常平倉米穀。動十分之三。減糶。其有實在窮民。無力買米。亦於三分之一中。酌

量借給。秋收後補還。○四十七年。題准。河南省各州縣常平倉存貯穀石。每年三分之一出陳易新。令將新貯倉穀。亦照常平倉之例。不必限定借數。隨民便借給。○五十一年。

論。陝西鞏昌等處存倉米二十萬石。於青黃不接時。聽民借領。俟秋收後。以數還倉。○又覆准。鞏昌等處產米無幾。民欠倉糧。准以麥一石抵米一石。大豆豌豆一石零抵米一石。還倉。有現價糶賣者。將價報明。亦俟秋收後。採買還倉。○五十二年。覆准。廣西米價昂貴。將常平穀借給貧民。○五十

三年。議准。廣東省歉收。動借倉穀。俟來歲買補還倉。○又覆准。甘屬地方歉收。動捐穀借給平糶。○五十四年。覆准。直屬樂亭等三州縣。收成歉薄。暫動倉糧。分別借給。○五十八年。覆准。陝西靖遠等十一州縣。秋禾被災。窮民乏食。將附近倉糧。酌量撥運借給。○又覆准。山東青萊等府災民。將常平倉穀酌量借給。○又覆准。甘屬被災。酌量給發籽種。○六十年。覆准。直隸大名府長垣等四州縣。因黃沁水溢衝漫。秋禾被淹。貧民乏食。該州縣將存倉米穀借給。如有不敷。於截

留漕米內通融動支。○又覆准。山西被災地方。令該撫將倉貯米穀。借給小民。○又覆准。黑龍江兵丁水手人等。所種地畝被災。借給口糧。於次年所得糧石。照數還倉。○又覆准。陝西甘屬。五十九年夏秋被災。今值春耕。撥解庫銀二十萬兩。給發籽粒。俟秋收後補還。○六十一年。覆准。直隸贊皇等五十九州縣。出借米穀。以濟民生。○雍正三年。覆准。東省曹縣魚臺二處。黃水漫溢被淹。窮黎難於度日。暫動常平倉穀。酌量借給。明歲麥熟後。照數還倉。仍將借過穀石數

目。造冊報部查核。○又覆准。直屬被水之後。小民乏食。於各屬存倉米內。酌量減價平糶。據領借給。以濟民食。於次年秋收後買補還倉。○四年。

諭。借放倉糧。每爲地方官掩飾虧空之計。且借放之時。往往利歸有力之家。窮民不得實沾恩惠。直隸倉糧。向來虧空甚多。朕知之甚悉。今直隸總督。爲未報災之州縣。奏請糶借倉糧。著派翰林。御史。部院賢能官。十數員前往。會同各該地方官。核實監糶。務使小民均沾實惠。其各處糧穀。果否實貯在

倉一併查驗。○又覆准。歷城等州縣田禾被淹。動倉穀酌量借給。○又覆准。嗣後直省州縣。遇借給民糧之時。或有貧乏兵丁。需借米穀者。該管官詳報督撫。一面報部。一面批行各該州縣查驗。果係兵丁需借。取具該管官印領借給。於支放兵糧時。按倉扣還。倘有該管官不行詳報。及不待批行。私出印領。州縣官私行借給。或州縣官不待督撫批行。擅卽支借者。該督撫卽指名題叅。照私動倉穀律治罪。其有該管官假託兵丁告借爲名。私支入己者。州縣官卽行揭報。該


督撫卽行題叅。以侵盜律治罪。如州縣官失於覺察。或明知而不揭者。各照本律議處。更或有奸詐兵丁。於借給民米之時。冒充百姓。私領米石者。發覺之日。將兵丁保甲等。一并從重治罪。○又議准。嗣後穀石。務令各州縣官。按名面給。至秋熟之後。按戶繳還。倘有爲吏胥朦混。捏名虛領。秋時追欠無著。將捏領之胥役。從重治罪。其所欠米穀。卽於該州縣官名下追還。并照失察例治罪。其有官役侵刻。小民不沾實惠者。該督撫察出題叅。亦按律治罪。

（Faint bleed-through text from the reverse side of the page, including characters like 戶部, 奏, 准, 題, 准, 撥, 給, 等）

緩徵

順治八年。議准。勘過被災地方。暫停徵比。以俟恩命。○康熙四年。題准。遇災地方。督撫一面題報。一面行令州縣。停徵錢糧十分之三。如州縣故將告示遲延。不即通行曉諭者。以違

旨侵欺。從重議罪。道府降三級調用。撫司降一級調用。○七年。題准。淮揚二府屬被災九分十分田地。漕糧漕項。於八。九。兩年帶徵。○九年。覆准。淮安府屬災田。除蠲免外。其應徵錢糧。緩至十年。十一年。各帶徵一半。○又覆准。淮揚帶徵漕糧



漕項。改於明年麥熟時徵解。其八年分漕糧漕
 項。於九。十。十一。三年帶徵。○又覆准。淮。揚。九年
 分漕糧漕項。寬至十年帶徵。○又覆准。山東金
 鄉等縣九年分漕糧。於後三年帶徵。○十一年。
 論。江南省連年水旱。將舊欠錢糧。一并停徵。并將十一
 年帶徵八。九。兩年漕項漕白銀米。俱暫停徵。○十二
 年。覆准。浙江嘉。湖。二府屬漕折銀。分兩年帶徵。
 ○十七年。題准。江南宿遷縣帶徵十六年漕糧
 漕項。於十八年帶徵。○十八年。題准。江南邳。宿
 徐。蕭。碭。五州縣災荒。以前逋欠。分作五年帶徵。

○又題准。江蘇等七府州漕米。本年徵一半。其
 一半。於次年帶徵。○十九年。覆准。江南賦繁。積
 欠。追比累民。其十三年至十六年錢糧。自十九
 年始。分年帶徵。以紓民力。○二十年。題准。溧陽
 等州縣。去年被災。將十九年未完漕糧漕項。
 於本年帶徵。○二十三年。

詔。江南。江西。浙江。湖廣。自甲兵以來。供應繁苦。自康熙
 十三年。至二十二年。拖欠漕項錢糧。著自二十三年
 起。每年帶徵一年。以免小民一時並徵之累。○二十
 八年。覆准。湖北各府被災。顆粒無收。將本年漕

糧漕項。於二十九。三十兩年。帶徵起運。○又覆准。太原大同所屬歉收。將上半年錢糧。緩至來年徵收。其應給兵餉。先動庫項買貯。○二十九年。覆准。山東沂州。郟城等二十四州縣。及濟南等衛所。歲收歉薄。其未完二十八年錢糧一十三萬二千有零。於康熙三十年帶徵。○又江西寧州等州縣。去秋被旱。奉

旨。被災九分十分田畝。本年錢糧。著緩徵。○三十年。題准。山西平陽府屬浮山等十一州縣。澤沁二州陽沁二縣蝗災。本年錢糧。已經照分數蠲免。舊

欠錢糧。准於三十一年秋成帶徵。○又

諭。原武等州縣未完錢糧。著於三十二年三十三年帶徵。○又

諭。朕頃巡行邊外。入喜峰口。見有民間田畝為蝗蝻所傷。又聞榛子鎮及豐潤等處地方。被蝗蝻災者。亦所在間有。秋成失望。則粒食維艱。朕心深切軫念。倘及今不為區畫儲蓄。恐至來歲不免饑饉之虞。著行該撫親歷直隸被災各州縣。通加察勘。悉心籌畫。應作何積貯。該撫詳議具奏。其被災各地方。明歲錢糧。若仍照例催科。小民必致苦累。著俟該撫察報分數到

日。將康熙三十一年春夏二季應徵錢糧。緩至秋季徵收。用稱朕體恤民生。休息愛養至意。○又覆准。陝西。鳳。二屬被災州縣。衛所。并都司民屯銀糧。除蠲免外。其餘未完及舊欠。俱緩至三十一年秋成帶徵。○三十一年。

諭。陝西華陰。澄城等州縣。三十年未完銀米。及三十一年春夏應徵銀米。俱著於秋成後帶徵。○又

諭。長武縣積欠銀米。著一并緩徵。○又覆准。平陽澤州所屬州縣錢糧。一并緩徵。○又山西夏。聞等州縣三十年帶徵未完錢糧。并借賑分貯米石。奉

旨。於三十二年帶徵。○三十二年。

諭。江浙二省。今年夏旱雖不成災。秋收量必有限。若漕糧照常徵收起運。恐民食將至匱乏。朕為此常切軫念。除浙江漕糧今年蠲免外。其江南漕糧。今年或三分免一。或免一半。俟至該省蠲免之年。將今年所免米石。照數補徵起運。於漕糧既無缺少。官民大有裨益。遵

旨。議准。將江蘇。安徽。本年漕糧。三分免一。此所蠲漕糧。俟至該省蠲免年分。照數補還。○三十三年。題准。江南六合縣荒歉。將二十二年。并二十四年。

至三十年。軍欠漕項銀米。於三十三年爲始。分年帶徵。○三十四年。江南未完地丁銀米。江蘇所屬二十八年起。至三十二年止。廬鳳二屬六合等五州縣二十七年起。至三十二年止。及蘇松。江安糧道所屬未完漕項漕糧。十八年起。至三十一年止。奉

旨。這歷年地丁及漕項未完錢糧。俱著自康熙三十四年始。分年帶徵。○又覆准。湖廣沔陽衛水冲田地。二十三年。至三十二年。未完銀兩。分年帶徵。○三十六年。題准。直屬被災之霸州等三十九州縣

與未經成災之獻縣等六州縣。三十五年。民借米穀。著緩徵。○又覆准。山西五臺等縣。田禾歉收。三十五年。未完錢糧。三十六年。應徵錢糧。俱於秋成徵收。○又題准。直屬三十六年。上半年錢糧。緩至明年帶徵。其下半年錢糧。二麥告成之際。催納。○又題准。江南淮揚徐泗地方。去歲水災。三十五年。一應錢糧。已經蠲免。其三十四年。未完錢糧。於三十七年。帶徵。○三十七年。

諭。山西省康熙三十七年。錢糧。已有諭旨。通行蠲免。靜樂等縣。三十六年。未完錢糧。若於三十七年。徵收。則

大清會典 卷三十八
小民仍有催科之累。著於三十八年帶徵。○三十八年。

諭。朕巡省民生風俗。自江浙返蹕。行經山東。幸今歲雨暘時若。二麥繼登。小民無憂粒食。但前年泰安等二十七州縣。生計尚未豐盈。所有康熙三十六年未完地丁銀米。俱著免徵。其三十七年應徵錢糧。恐一歲未能完納。令分作三年帶徵。○又題准。江西省進寧等州縣田畝。盡在山中。蓄積亦少。舊逋新欠。難以並徵。將三十五。六。兩年未完民欠銀。於三十九。四十年帶徵。○三十九年。題准。山西省靜樂

沁源二縣。三十五。六。兩年未完錢糧。俱緩至三十八年帶徵。但合之三十八年額徵正賦。小民有三年並徵之苦。將三十六年未完錢糧。再緩至三十九年秋成徵收。○又江南三十四。五。六年漕項民欠未完。奉

旨。這漕項積欠銀兩。著分年帶徵。其積欠米麥。俱著免徵。○又覆准。直隸廣平縣夏被水災。未完錢糧。緩至四十年秋成徵收。○四十年。覆准。甘肅寧夏等處被旱。將錢糧暫行停徵。○又議准。甘屬本年錢糧。於四十二年帶徵。○四十一年。山東省泰

安等六州縣墾荒地畝陞科錢糧未解奉

旨。分三十八。九。四十年帶徵。○又題准。山西靜嵐。二縣

被災最重。其三十六年未完錢糧。准於四十一

年起。分作三年帶徵。○又題准。陝西西寧衛下

任。上川口。巴古等堡。應徵屯糧。於四十二年帶

徵。○四十二年。題准。祥符等州縣被災錢糧。著

緩徵。○又覆准。奉天承德等州縣歉收。將四十

二年應徵米豆。并借給民人穀石。俱於次年帶

徵。○又

諭。東省今歲錢糧漕米。俱應速行停徵。○四十三年。題

准。直屬廣平等處。高下俱遭雨水淹沒。照荒田

墾種。三年起科。至所有未完民欠。及俸工銀。分

作三年帶徵。○又題准。山東省泰安等州縣麥

禾被災。四十二年錢糧。已經停徵。其歷年民欠。

分作三年帶徵。○四十四年。

諭。嗣後蠲免錢糧時。將歷年未完舊欠錢糧。停其徵收。

次年仍照常徵收。○又題准。直隸河間府屬。去歲收

成歉薄。將四十一。二。三等年未完錢糧。緩至次


年帶徵。○又題准。江南睢寧等縣被災。應徵地

丁漕項銀米。著暫停徵。○四十五年

諭南鄭城固畧陽沔縣郿縣被水災地方應納銀米著暫停徵。○又覆准寶坻等處減糶并民借米穀均緩至來年秋成催買還倉。○四十六年題准直隸武清寶坻永清東安梁城所楊村廳等六處四十五年被災其未完起運銀於四十六年秋成帶徵。○四十七年。

諭朕屢次南巡見閭里殷阜之家遠不逮於舊時朕於民生風俗無不一一咨訪雖不時蠲免額賦停徵積逋僅可支吾卒歲絕無餘蓄且今承平既久生齒日繁食漸不充川多不給亦理勢之所必致朕每念及

此未嘗不為之惻然去年江南浙江二省俱被旱災多方軫恤始蘇民困今歲復報潦傷旋經照例蠲賑並下詔書留漕資濟但歲再不登生計益匱欲令辦賦力必難供朕於國家一切經費屢年撙節帑藏充裕以此弘敷膏澤藏富於民俾得盡力農桑衣食滋殖百姓既足國用何憂所有舊欠帶徵銀米仍暫停追取此朕因江浙二省為東南重地特於格外施恩用弘休養之至意。○又覆准浙省杭湖二府屬被災之仁和等八州縣應納本年漕糧共三十六萬八千九百三十四石零於本年徵收一半其一



半。俟次年帶徵完納。○又覆准。江南地方兩歲被災。將本年應徵一半漕米。於四十八年秋收後帶徵。○又題准。福建臺灣等三縣。連年旱災。將四十六年應徵額粟。於四十七。八。兩年帶徵。○四十八年。題准。山東禹城等二十一州縣。濟南等二衛。大風。有傷麥苗。將被災州縣衛。四十七。八。兩年地丁錢糧。暫緩催徵。俟本年秋收後完納。○又題准。河間等府屬州縣。未完四十七年民欠錢糧。緩至四十八年秋成帶徵。四十八年地丁錢糧。緩至四十九年麥收之後。帶徵一

半。俟秋成全完。○又題准。江淮揚徐屬邳宿等十三州縣。衛。本年夏麥秋禾俱傷。其現運漕糧及漕項銀兩。及舊欠漕項錢糧。俱於四十九年秋收後。帶徵搭運。○又覆准。河南鹿邑等縣被災。應徵四月完半錢糧。緩至秋成徵解。○又覆准。浙江德清一縣。被災尤甚。所有應徵未完平糶漕米一萬二千八百六十七石三斗。於秋收後照數徵完。同帶徵一半漕糧搭運。○又

諭。武清等被災十三州縣。衛。所。本年未完錢糧。著於明年秋收後帶徵。○又

大清會典 卷三十八
諭。邳。宿等十三州縣一衛。現運漕糧。及漕項銀兩。並舊欠漕項錢糧。俱於明年秋收後。帶徵搭運。○四十九年。覆准。河南省雨水失時。人民乏食。四十八年未完錢糧。於四十九年秋收後帶徵。○又覆准。江南省山陽等州縣。衛。四十八。九。兩年河灘地租。已照民田地丁。一體全免。其四十七年以前舊欠。亦停徵一年。○又覆准。江南江。蘇。等屬。及淮。揚。徐。三府屬。屢經水旱。新舊民欠錢糧。令於五十三年帶徵。○又覆准。江南溧陽縣。四十七年被災。錢糧既完。其舊欠。照松。蘇。等屬一例於

四十九年秋收後帶徵。○又題准。江蘇等屬四十四。五。六。七。等年未完地丁漕項屯折銀糧。於五十年起。至五十三年。挨次分年帶徵。○又覆准。福州等府屬州縣。雨澤稀少。將四十九年未完地丁錢糧。暫行緩徵。○又兩浙竈地濱海低窪。連被水淹。所有四十七。八。兩年未完鹽課。奉旨。自四十九年起。分作三年帶徵。○又

諭。浙江省四十五。六。七。年舊欠錢糧。分三年帶徵。○五十二年。題准。陝西甘屬四十九年舊欠銀兩。於五十五年帶徵。○又覆准。四川茂州本年應徵

錢糧暫行停徵。○五十四年覆准直屬地方雨水過多。春夏青黃不接。艱於粒食。將順天府屬之寶坻。霸州。等州縣。河間府屬之任邱等十四州縣。及武清境內蘆漁課地。今歲未完錢糧。一并緩徵。○又題准陝西甘屬被災地方五十二年未完錢糧。暫行停徵。○又覆准陝西甘屬五十三年被災地方共二十八處。歷年未完銀糧。草束。各照數分年帶徵。○又題准陝西甘屬今年雨澤愆期。將本年錢糧暫行停徵。○又題准浙江杭。紹。等七府屬。並遭旱澇。新舊錢糧。分作

三年帶徵。○五十五年覆准蘇。松。等府屬去年被災。錢糧緩至五十五年秋成後帶徵一半。五十六年全完。○又覆准浙江。江寧。安徽。等屬被災州縣。衛。現年應徵地丁錢糧。再歷年舊欠漕項地丁銀米。均令緩徵。俟來春麥熟徵報。○五十六年。題准直隸南和等四縣。五十五年秋被水災。將五十五年未完地丁銀兩。於本年秋成帶徵。○又覆准江南安徽所屬歷年民欠。值災荒之後。行令該撫將四十六年至五十四年各項舊欠。分年帶徵。○五十七年覆准陝西涼州

大清會典 卷三十八
衛等一十三處夏禾被災。其本年應徵錢糧。暫行緩徵。○又覆准。福建臺灣府屬三縣去歲旱災。將五十六年正項錢糧。分於五十七。八。兩年帶徵。○又覆准。浙江仁和等州縣。衛所。秋被旱災。將本年錢糧。緩至來歲麥熟後徵收。其五十四年以前所有民屯。尾欠地丁銀米。亦令分年帶徵。○五十八年。題准。陝西靖邊等十堡秋禾被災。其應徵本色糧草。暫行停徵。○五十九年。覆准。江南江蘇等屬。自四十八年起。至五十八年止。倉糧銀米。及衛屯糧。於五十九年起。挨次

分年帶徵。五十五年地丁等項錢糧。於六十二年帶徵。四十七年漕米。於五十九年起。三年帶徵。○又覆准。陝屬五十四。五。六。七。等年未完民欠錢糧。令其分年帶徵。○又題准。陝西固原。平涼。臨洮。等州縣。夏禾被災。將本年分額徵錢糧。停徵。○又覆准。西安屬之定邊。一所。磚井。安邊。鹽場。三堡。地方。不雨失收。本年錢糧。已經

皇恩蠲免。其本色糧石草束。暫予緩徵。○又覆准。葭州

並宜川等州縣。秋禾失收。額徵草束。照例停徵。○又覆准。浙江金。衢。二府屬。五十八年旱災。其

五十四。五。二年錢糧。於六十年秋成帶徵。五十六。七。兩年錢糧。於六十一年秋成帶徵。○又覆准。山東樂安等十五州縣。安東等六衛所。五十八年秋旱。其未完緩徵銀兩。於六十。六十一。兩年帶徵。○六十年。覆准。直隸。山東。河南。山西。四省被災州縣。令督撫查明應徵錢糧。暫行緩徵。○又覆准。山東壽張等縣被災。本年錢糧。并五十九年未完錢糧。緩至六十一年徵收。其本年未完漕糧。分爲三年帶徵。○又覆准。浙省仁。錢。等縣被災。將五十四。五。六。三年錢糧。於六十一

年帶徵。其五十七。八。九。三年舊欠。挨次三年帶徵。○又覆准。浙省於潛等州縣。衛被災。錢糧緩至六十一年麥熟後徵完。○又覆准。黃。沁。兩河水決。長垣。東明。開州。滑縣。田禾被淹。新舊錢糧。俟明年麥熟後徵收。○又覆准。沁河水決。流入東省之壽張。濮州。范縣。聊城。博平等境內。麥豆淹沒。將各州縣六十年未完漕糧。分作三年帶徵。○又題准。陝西。西。鳳。延。三府屬夏禾被災。貧民乏食。將六十年額徵糧草。暫行停徵。○又覆准。湖廣。沔。陽。州。衛。夏被水災。田禾淹沒。將五十

九年地丁屯餉銀。緩至六十年秋成後開徵。至五十四。五。六。七。八。等年未完舊欠。自六十年起。分年帶徵。○又覆准。安徽新安衛被災。本年地丁。及各年舊欠。緩至來歲麥熟徵收。○又覆准。江蘇等屬三十三年起。至五十七年未完蘆課銀。於六十一年起。挨次每歲帶徵二年。○又題准。山西平。汾。二府旱災歉收。新舊錢糧。自六十年起。分作五年帶徵。○又覆准。山西潞安府之襄垣等五州縣被旱。新舊錢糧。緩徵。秋成完納。○六十一年。題准。山西平陽府被旱。將五十六

等年未完民欠。自六十一年起。分作五年帶徵。汾州府五十八。九。兩年未完民欠。於六十一年起。分作三年帶徵。○又覆准。山東壽張等州縣。其本年錢糧。并漕糧漕項。以及六十年未完民欠。均俟下年成熟之後。分作三年帶徵。○又題准。江南常。鎮。淮。府屬州縣。疊被旱災。本年漕糧。緩徵一半。俟下年帶徵。又海。邳。等州縣被災。更甚。本年地丁漕項。緩至秋成起徵。○雍正元年。覆准。直隸開州。長垣。東明。滑縣。四州縣。康熙六十年未完民欠錢糧。自雍正二年為始。分作三

年帶徵。○又議准。河南衛輝等府屬。夏被旱災。入秋黃水為患。本年錢糧。及舊欠錢糧。緩至秋收後。再行徵收。○又覆准。山東歷城等州縣。衛所。六十年民欠錢糧。自雍正元年起。分作三年帶徵。○又覆准。山東壽張。濮州等四州縣。衛黃水未退。所有六十一年帶徵六十年漕糧漕項。自雍正元年始。分作三年帶徵。○又覆准。江南武進等州縣災田漕糧。緩徵一半。俟雍正二年秋成帶徵。○又

諭。朕惟治民之道。在愛養民力。蓋民力寬舒。則元氣

自復。此裕阜之要務也。山東。山西。河南三省。連年田禾歉收。朕軫念窮黎。已發帑賑濟。復將現年錢糧。盡行緩徵。而歷年民欠帶徵之項。若仍行追比。緩新而徵舊。於兆姓終無裨益。目今時雨霑足。秋禾滋茂。登穫在望。俾耕鑿小民。終歲無催歛之煩。家室有蓋藏之慶。則力既有餘。輸將亦易。來年自必急公完賦。戶部將山東省五十八年。至六十一年。分帶徵未完錢糧。山西省五十六年。至五十九年。分帶徵未完錢糧。河南省五十九年。至六十一年。緩徵錢糧。作速行文三省該撫。著俱停徵一年。

大清會典 卷三十八 戶部十六
三
務使里井沾恩。吏胥無擾。以副朕愛養民力至意。
○又覆准。河南開封等府屬五十九。六十年未
完民欠。在停徵之外。亦令於二年帶徵。其六十
一年未完銀。於三年帶徵。○又覆准。浙江富陽
等二十九縣。台州衛。嚴州所。秋被旱災。本年應
徵錢糧。於來年麥熟後徵收。○又覆准。仁和等
二十一州縣。杭州右前二衛。及湖州所。秋旱被
災。本年錢糧。緩至來年麥熟後徵收。○又覆准。
直隸正。順。廣。大。府屬四十二州縣。上半年錢糧。
緩至次年徵收。○二年。覆准。浙江仁和等十一

縣秋被潮淹。本年錢糧。緩至次年麥熟後開徵。

○又

諭。朕軫念民依。時厯宵旰。遇有旱澇災荒。惟恐窮黎
失所。雍正元年。因直隸。河南。山東。山西。二麥歉收。
特遣廷臣發粟賑濟。錢糧除被災分數已經蠲免。
停徵。嗣蒙

天庥。雨暘時若。四省秋成豐稔。少慰朕懷。但念四省頻
歲荒歉。較別省爲甚。今百姓元氣方復。若將兩年
舊欠。并於本年徵收。民力恐不能支。速行文各該
撫。查明實在舊欠若干。據實題報。分作三年帶徵。

其已收在官者。速飭起解。毋令不肖有司。借端牽混。致滋虧空。○又覆准。河南省康熙五十九。六十年。兩年舊欠錢糧。於雍正三。四。兩年。各帶徵一半。○又覆准。山西省太。平。潞。汾。大。五府。澤。沁。遼。三州。歷年未完民欠錢糧。并帶徵銀兩。均分作三股。於雍正二。三。四。等年。每年帶徵一股。○又覆准。福建臺灣。遭匪類蹂躪。五十九年未完稻粟。分作三年帶徵。○又覆准。江南蘇。松。鎮。淮。揚。五府屬之太倉等十四州縣。本年田禾。被風潮淹損。將漕糧緩徵一半。俟三年秋收後帶徵。又海

州地方。今歲被災。更甚於去歲。本年災田漕米。全予緩徵。俟來歲秋收後。徵完起運。○三年。

諭。朕撫育烝黎。務期休養寬裕。俾咸臻安阜。故於各省雨暘節候。時時咨訪體察。無刻少釋於懷。近聞河南。山東。春雨稍缺。朕心深切軫念。雍正元年七月。曾降諭旨。將河南省康熙五十九年。至六十一年。分帶徵未完錢糧。山東省康熙五十八年。至六十一年。分帶徵未完錢糧。俱著停徵一年。雍正二年二月。復念二省去歲秋成雖稔。百姓元氣方復。舊欠新徵。恐難兼顧。諭令該撫。將實在民欠。分作

三年帶徵。以紓民力。今二省春雨未足。民氣未能舒暢。朕念本年正供。方竭力輸將。而分年舊欠。復欲及時完納。民力未免拮据。用是再沛恩澤。著將河南省。康熙五十九年。至六十一年。帶徵錢糧。并雍正元年未完民欠。俱從雍正二年起限。寬作五年帶徵。山東省。康熙五十八年。至雍正元年。帶徵錢糧。爲數更多。著從雍正二年起限。寬作八年帶徵。速行文該撫。查明實在民欠數目。按照年分。以便帶徵。俾閭閻納賦舒徐。以副朕勤恤民隱至意。倘不肖有司。不按年分。預行追比者。卽指名題叅。

從重治罪。其已收在官者。速飭起解。毋令借端牽混。以致侵蝕虧空。○又覆准。長蘆民被水災。鹽餉壅積未銷。應輸正課。勢難責其按季完納。將雍正三年秋冬二季引課等銀二十一萬四千九百七十餘兩。分作二年帶徵。於四五兩年。照數徵解。○又覆准。長蘆各場竈地。亦被水災。將雍正三年青滄二分司被災十六場額徵課銀一萬餘兩。於雍正四年帶徵全完。○又覆准。直屬霸州等七十三州縣廳所。秋禾淹沒。令地方官查明被水村莊地畝錢糧。緩其徵收。○又覆准。

大清會典 卷三十一
濟東二府屬禹城等十七州縣。衛。天道亢暘。二麥損傷。新舊錢糧。暫緩至秋成後徵收。○又覆准。山東曹縣黃水冲決。沿太行堤田地被淹。應徵新舊錢糧。暫緩至明歲麥熟後徵收。○又覆准。廣東歸善等縣被災。錢糧暫行緩徵。○又覆准。直隸霸州等七十二州縣。衛。所。村莊緩徵地畝。凡佃戶有未完之租。田主不得照常催討。緩至明年豐收之時。一并完納。其未被水村莊地畝。仍令照常納租。不得借端圖賴。致田主徵賦無辦。○又覆准。東省歷城等四十三州縣秋禾

被災。其本年應徵漕米漕項。及臨。德。二倉米麥銀兩。并德州。濟寧。東平。東昌。臨清。等五衛所應徵本年河銀漕項銀兩。均緩徵一半。俟下年秋收後。徵完起運。○四年。

諭。去秋北方多雨。直隸所屬七十三州縣被水歉收。朕心深為軫恤。疊沛恩澤。加惠窮黎。已將七十三州縣被災地畝之錢糧。照例蠲免。其餘應徵額賦。又復停徵在案。朕思一省之中。既有七十餘州縣收成歉薄。則隣封隔縣。必有謀生覓食之人。當此青黃不接之時。閭閻豈能寬裕。若仍照舊徵收錢

大清會典 卷三十八
三十五
糧。民力輸將。未免竭蹶。用是特頒諭旨。施恩於常格之外。將雍正四年通省應徵額賦。一并停其徵收。俾民力寬舒。各得用力於南畝。以副朕勤恤民隱之至意。○又

諭。去歲畿南被水。深軫朕懷。雖截漕發粟。賑糶頻施。然恐小民甫經災沴之後。無力供輸。是以又特降諭旨。將雍正四年錢糧。通省俱令緩徵。夫今年錢糧。尚且緩徵。則從前未完之欠。豈有反急徵之理。今聞地方官。竟有仍追比前欠者。漠視民瘼。莫此爲甚。深負朕憂念斯民之至意。著傳旨直隸總督。

速飭各地方官。凡一切舊欠錢糧。一概緩徵。其所
有兵餉工料各項需用之處。俱動藩庫銀撥給。不
得短少尅扣。如地方官仍有私徵等弊。一經察出。
定行從重治罪。○又


諭。去年山東濟南。兗州。東昌。三府偶有水患。朕心軫恤。蠲賑兼施。復將本年漕米。或全緩徵。或緩徵一
半。以紓民力。今年山東雨水調勻。二麥豐登。民生
樂業。惟是去歲低窪之處。又經今夏之雨。未必能
及時播種。可獲全收。查去歲緩徵之米。應於今年
並徵。誠恐民力艱於輸將。用是再沛恩澤。將去年

大清會典 卷三十八
全緩之州縣。令其於今年帶徵一半。明年帶徵一半。著山東巡撫。轉飭各該州縣。實力奉行。務使民力寬餘。以副朕加惠閭閻之意。○又

諭。江南地方。今歲秋冬。雨水稍多。低窪之處。未免減收。目前米價雖平。恐明歲青黃不接之時。價值不免昂貴。朕心軫念。預爲籌畫。已特遣專官。將從前截留糧米。一一清查。會同該督撫商酌。以濟地方之用。又令該督撫。動用正項錢糧。委員於隣省採買米穀。以備積貯平糶之需。朕思蘇。松。常。鎮。四府地廣人稠。需米甚多。而四府所屬漕兌。共一百四

十餘萬石。居七省漕糧三分之一。今州縣既有被水之區。恐小民輸納匪易。著將成災五分以上之地畝。應出漕米。緩徵一半。約計將及二十萬石。俾閭閻既寬正額之輸將。而地方又有多餘之米粟。則編戶窮黎。當不慮其乏食矣。其緩徵一半漕米。著於雍正五年秋收後帶徵完納。其不成災之地畝。仍照額徵之數。准其紅白兼收。著將此速諭該督撫遵行。○又覆准。江西南昌等府屬地方被災。錢糧暫行緩徵。○又覆准。東莞等十一縣被水。將存倉穀石賑濟。其錢糧暫行緩徵。○又覆准。

東省鄒平等縣。衛被水。將本年錢糧。緩至來歲
麥熟後徵收。



大清會典卷之三十八

文政三



